

## 2 PITA

# Pita kipihac wê vông yuu ge

<sup>1</sup> A, Saimon Pita, a ga Yesu Kîlisi nu yuac dî a tu sinale ti. A kivuu kipihac tiga loc vô xam wê xam vông i vin Anutu tiyi xocbê xe vông i vin ge. Môp vông vinêng tige niviha. Il vông i vin lec môp niviha wê Kîlisi vông ge. Yesu Kîlisi ge il Anutu i wê vô il vêl ên il nêd nipaên. <sup>2</sup> Xam xovô Anutu yuu il lig Apumtau Yesu, om xam vông xovôêng tige i vô levac, ên xêyaa vin lecêng yuu kiyang malehe i vô levac vô xam.

*Il ob vông môp wê Anutu tyuc il dî vinoo il ge  
i vô nôn lec*

<sup>3</sup> Anutu vông susu hixôn nôn niviha vihati vô il ya xêkizêc wê i vông ge ên nêb nôn tigee i ngidu il xôn gê kibun ga dî didii il mi la vac môp niviha wê Anutu vông ge vihati mi il timu vô. Om il kô nôn tigee vihati ya xovôêng niviha wê Anutu vông vô il lec ici va ge. Anutu tyuc il ya xêseac yuu lê levac wê i vông ge ên nêb il tu i nue. <sup>4</sup> Ilage Anutu hilu kiyang tibeac vô il ên nêb ob vông nôn niviha vihati vô il ya xêseac yuu lê levac wê i vông ge. Nôn tigee niviha yang. Lêc môp nipaên wê il nilôd kidu il ên nêb il vông ge yêp vô il gê kibun ga om vông il vô nipaên. Om Anutu vông kiyang wê hilu pyap ge vihati vô nôn lec vô il dî vông nôn niviha vihati vô il ên nêb he i ngidu il xôn dî il pec ên môp wê ob vông

il vô nipaên ge, dì il tu xomxo niviha nôn i tiyi xocbê Anutu vaci ge.

<sup>5</sup> Anutu nêb il ob tu xomxo niviha i tiyi xocbê i ge, mègem a ob nêl vô xam bê xam lêc vông yuac xêkizêc dì vông môp niviha vihati i yêp hixôn vông vinên wê xam vông ge, dì xam kô xovôen niviha hixôn, <sup>6</sup> dì xam viac xam ên môp wê nimnivi xovô ge, dì xam le xêkizêc vac viyin, dì xam timu vô môp wê Anutu vông ge vihati, <sup>7</sup> dì xêmyaa i vin lec lime, dì xêmyaa i vin lec xomxo vihati hixôn. <sup>8</sup> Èn xam obêc timu vô môp bêgee dì vông i vô levac ge od xovôen wê xam xovô lec il lig Apumtau Yesu Kîlisi ge obêc yêp vidaaen lêm. Nge, ob vô nôn niviha vô xam, dì xam ob vông yuac niviha ya. <sup>9</sup> Lêc xomxo vông vinên ti obêc vông môp tibêgee lêm ge od tiyi xocbê manôn toc dì o yê vigwe lêm, ên ilage xovô wê Anutu kitya i nêñ nipaên vêl ge lê, lêc gwêbaga lungên môp tige nang.

<sup>10</sup> Xam lige, Anutu tyuc xam dì vîn oo xam pyap ên nêb xam tu i nue. Mègem xam vông yuac xêkizêc, ên môp wê Anutu tyuc xam dì vîn oo xam ge i vô nôn lec. Èn xam obêc vông bêge ge od xam ob le xêkizêc dì susu ti ob pwoo xam pec lêm, <sup>11</sup> dì Anutu obêc tax vuayen ên xam dì xam la vac Yesu Kîlisi ben dì Anutu obêc hi vixa pec ên xam dì viac xam dô luta lêc luta. Yesu Kîlisi ge il Apumtau wê vô il vêl ên il nêd nipaên.

<sup>12</sup> Kiyang wê a nêl vô xam ge, xam ngô dì vông i vin pyap, dì xam mi le xêkizêc vac kiyang nôn tige. Lêc a nêb a ob nêl kiyang tige i tii vac nang vô xam, <sup>13</sup> om tiyi buc vihati wê a dô magviha gê

kibun ga ge od a ob nêl kiyang tige i tii vac vac vô xam ên xam ngô dì hôm xôn pilihi. A obêc vông bêge ge od nivîha, <sup>14</sup> ên il lig Apumtau Yesu Kîlisi nêl kitong vô a om a xovô bêga ên a nêbê buc wê a ob xib ge vô kwabo lec. <sup>15</sup> Om a nêb a ob vông yuac xêkizêc dì nêl kiyang tige i tii vac vô xam, êdêc wê a xib ge od kiyang wê a nêl vô xam ge i yêp vac xam piyôp dì xam xovô i tiyi buc vihati.

### *Pita yê xêseac wê Kîlisi vông ge*

<sup>16</sup> Xe nêl xêkizêc wê il lig Apumtau Yesu Kîlisi vông ge kitong vô xam, dì xe nêl vô xam ên xe nêbê Yesu obêc vena i tii vac nang. Lêc xe o ngô pîvulac vidaaén ti lec Yesu mi nêl kitong vô xam lêm. Nge, xe xê Yesu lec mamnôn, dì xe xê xêseac wê i vông ge. Om xe nêl kitong vô xam. <sup>17</sup> Mag Anutu vông Yesu lê vô levac dì vông xêseac wê i vông ge vô i. Anutu wê xêseac kehe ge vông kiyang lam vô Yesu bêga ên nêbê, “Xomxo tige a nug wê a xêgyaa vin lec i dì a xê i nivîha ge.” <sup>18</sup> Xe dô hixôn Yesu lec kitôn ngîbua om xe ngô vyâ tige wê lam gê lag kisiinê ge.

<sup>19</sup> Om xe xovô bêga ên xe nêbê kiyang wê plopete vihati nêl ilage, he nêl vîxôhîlôg nôn. Om xam obêc hôm he kiyang tige xôn pilihi ge, od xam ob dô nivîha. Ên kiyang wê he nêl ge tiyi xocbê lam wê linac vac mapitoc ge. Om xam timu vô he kiyang dì i loc tyip vô buc wê Kîlisi obêc vena hixôn xêseac ge. Xêseac wê i vông ge ngînoo xêseac wê lam vông ge vêl. Vô buc tige il ob xovô plopete kiyang wê he nêl ilage i yêp seac. <sup>20</sup> Lêc taxlee ge xam xovô bêga bê xomxo ti o tiyi wê ob nêl plopete kiyang kehe kitong ya xovôên

wê ici va vông ge lêm. <sup>21</sup> Èn ilage he plopete ti o nêl kiyang ya xovôen wê heche va xovô ge lêm. Nge, Myakilôhô Ngibua vông Anutu kiyang vô he lêc he nêl.

## 2

### *Môp nipaên wê plopete kityooên vông ge*

<sup>1</sup> Ilage plopete kityooên ya kidi lec vac he Islel mahigun. Dì gwêbaga plopete kityooên ya obêc kidi lec vac xam mahigun dì kityoo xam ya xolac kityooên, dì he ob viyum kiyang nipaên vac kiyang niviha nilô, dì nêl kiyang kityooên viyang viyang wê obêc vông xomxo vô nipaên ge, dì he ob yax Apumtau wê vô he vêl ên nipaên ge vun. Om môp nipaên wê he vông ge wê Anutu obêc kitya he vêl lutibed. <sup>2</sup> Dì he obêc dìdii xomxo tibeac la vac môp yôdac hixôn môp wê vaxvax ge. Om môp nipaên wê he vông ge ob vông xomxo nêl kiyang nipaên lec Anutu môp yuu kiyang nôn. <sup>3</sup> Plopete kityooên tigee mi vông nilô la vô mone, om he ob nêl kiyang kityooên vô xam ên nêb ob kô mone vô xam. Lêc ilage Anutu nêl mi i yêp pyap ên nêb obêc yaxên he nêl kiyang dì vông myaviwen vô he. Anutu wê obêc kitya he vêl ge o lungên he lêm. Nge, dô bin buc wê obêc vông myaviwen vô he ge.

<sup>4</sup> Ilage angela ya vông môp nipaên, lêc Anutu o xo vigwe pisiv ên he lêm. Nge, tii he la vac vigwe nipaên, dì vông he la dô kalabuhu vac lôva wê mapitoc ta ge. Om he ob la dô dì i la tyip lec buc wê Anutu ob yaxên he nêl kiyang ge.

<sup>5</sup> Ilage lec buc wê Nôa dô mavîha ge od xomxo

vô nîmi vô Anutu, lêc Anutu o xo vîgwe pîsiv ên he lêm. Nge, vông mia tyip vac kîbun dî hi he ma vêl. Mêd Nôa tibed wê mi nêl môp nivîha kitong mi i yêp seac, om Anutu viac Nôa dî xomxo vîgê vîlu dî sec yuu ge he dô maviha vô buc wê mia hi tibii ge. <sup>6</sup> Ilage Anutu yaxêñ môp nipaêñ wê tibii Sodom yuu Gomola vông ge. Om vông myaviwen vô vîgwe yuu ge, dî nyuu yuuva ngwax levac dî ngwax ya yuu ma vêl, om vîgwe tu vîwev pîleva. Anutu vông bêge ên nêb xomxo wê vô nîmi vô i ge he i yê dî xovô bê Anutu obêc vông myaviwen vô he. <sup>7</sup> Lot mi dô vac vîgwe Sodom, lêc Anutu hôm Lot vêl ên ngwax wê ob ya vîgwe Sodom yuu Gomola ge, ên Lot ge xomxo nivîha ti. Om môp yôdac hixôn môp nipaêñ vîhati wê tibii Sodom yuu Gomola vông ge vông Lot nilô vô vîyin. <sup>8</sup> Ên Lot ge xomxo nivîha wê nilô timu vô môp nivîha ge, lêc dô vac he mahigun om yê môp nipaêñ wê he vông ge dî ngô kiyang nipaêñ wê he nêl ge. Om vông i nilô vô vîyin mabu yocêñ tiyi buc vîhati. <sup>9</sup> Kiyang tige wê nêl lec angela nipaêñ hixôn Nôa yuu Lot ge ob vông xovôêñ vô il bêga bê Apumtau xovô vîyin wê tulec xomxo nivîha ge om ici va tiyi wê ob vô he vêl ên vîyin tige. Di xovô môp nipaêñ wê xomxo nipaêñ vông ge om ici va tiyi wê ob vông myaviwen vô he dî i la tyip vô buc wê obêc yaxêñ xomxo vîhati nêl kiyang ge. <sup>10</sup> Plopete kityooêñ obêc kô myaviwen nipaêñ i luu vêl, ên he mi vông môp yôdac hixôn môp ningeac vîhati, dî yê Anutu kiyang hixôn xomxo levac kiyang tiyi xochê kiyang pîleva ge, dî he mi

yong he dì timu vô môp wê he nilô xovô ge, dì he nêl kiyang nipaên lec angela lag kisiinê dì o xona lêm. <sup>11</sup> Angela tigee lê hixôn xêkizêc wê he vông ge luu xomxo vihati vôngo vêl. Lêc angela tigee o luu kiyang nipaên ti lax vô plopete kityooêñ tigee lêm, dì he o vông kiyang vô Apumtau lec nipaên wê xomxo tigee nêl lec he lêm.

<sup>12</sup> Plopete kityooêñ tigee mi timu vô môp nipaên wê ninivî vông ge, om he tiyi xocbê bwoc vimen wê piyôp maên wê xomxo ob tii he dì hi he yib ge. Ên he nêl kiyang nipaên vaxvax lec kiyang wê he xovôêñ kehe ma ge. Om môp nipaên wê he vông ge obêc vông he vô nipaên di kitya he vêl, <sup>13</sup> dì he obêc kô myaviwen nipaên lec nipaên wê he vông ge. Ên he xêyaa vin lec wê he ob num dì vông môp nipaên vô viðiiêñ wê hiyôv ge. Dì he ya yaêñ hixôn xam, lêc he nilô vô niviha ên môp nipaên wê he mi vông ge, om he tiyi xocbê do nipaên vac xam mahigun ge. <sup>14</sup> Dì he manôñ yê vêx dì xo môp yôdac, dì he o dô seac vêl ên môp nipaên lêm. Dì he didii xomxo wê o vông i vin xêkizêc lêm ge mi la vac môp nipaên, dì he vông piyôp yuu nilô la vihati vô susu kibun ga. Anutu nêl pyap ên nêbê obêc kitya he vêl. <sup>15</sup> Plopete kityooêñ tigee sea môp niviha dì la vaxvax vac môp nipaên, dì timu vô môp nipaên wê Bio nu vux Belam vông ilage. Belam xêyaa vin lec wê ob vông môp nipaên dì kô mone lec. <sup>16</sup> Lêc bwoc donki wê Belam vông ge nêl i nêñ nipaên kitong vô i. Bwoc donki o tiyi wê ob nêl kiyang ge lêm. Lêc donki tige keac vô Belam tiyi xocbê xomxo keac ge dì nêl Belam nêñ

nipaên kitong vô i. Om donki tige le vac plopete Belam nilô judajuda xôn.

<sup>17</sup> Om plopete kityooên tigee vihati tiyi xocbê lôva wê xomxo mi kîlê mia vac lêc mia tuacêng, dì he tiyi xocbê lun mapitoc lêc lun valêng ma ge. Om Anutu viac vigwe mapitoc ta wê he obêc la dô vac ge. <sup>18</sup> Xomxo tigee kô he lec di keac via levac lec kiyang pileva wê nôn maêng. Dì he kityoo xomxo wê gên sea môp nipaên wê tibii madiluhu vông ge, dì didii he lax mi la vac môp yôdac hixôn môp nipaên wê he ninivi xovô ge. <sup>19</sup> Xomxo kityooên tigee nel bêga ên nêbê, “Xam obêc nêb xam ob vông môp ti i tiyi wê xam xêmyaa vin lec ge od xam vông. Lêc môp tige ti o tiyi wê ob viac xam ge lêm.” He nel bêge lê, lêc he nel kiyang kityooên. Ên he tu xomxo yuac wê môp nipaên viac he ge. Ên môp nipaên ti obêc viac xomxo ge od xomxo tige ob tu môp nipaên tige nu yuac. <sup>20</sup> Xomxo ob xovô il lig Apumtau Yesu Kilisi wê vô il vêl ên il ned nipaên ge, dì vông i vin i, dì pec ên môp nipaên kibun ga wê vông he vô nipaên ge, lêc he obêc pilepac he mi lax vô môp nipaên tii vac nang di môp nipaên obêc hôm he xôn ge, od he obêc dô vac nipaên luu wê he dô vac tax ge vêl. <sup>21</sup> Ên ilage he o xovô môp nivîha lêm om he dô vac nipaên. Lêc gwêbaga he xovô dì vông i vin Anutu kiyang, lêc he vô nîmi vô, om he ob dô vac nipaên luu wê he dô vac ilage vêl. <sup>22</sup> Om nipaên wê tulec he ge tiyi xocbê kiyang ti wê yêp bêga ên nêbê, “Noo mi ya susu wê he mutac ge tii vac nang.” Dì kiyang ngwe nel bêga ên nêbê, “Bwoc ti wê

loc hixôn ninîvi nivîha ge ob lax lipac i vac lôm  
tii vac nang.”

### 3

#### *Apumtau Yesu obêc vena vixôhilôg*

<sup>1</sup> Xam lige, ilage a kivuu kipihac ti vô xam, nang dêc gwêbaga a kivuu kipihac ngwe ga wê vông yuu ge vô xam. Lêc a kivuu kipihac yuu ge vô xam ên a nêb i tipi vô xam piyôp i yêp seac dì xam xovô kiyang tiga i tii vac. <sup>2</sup> A nêb xam xovô kiyang wê plopete ngibua nêl ilage i tii vac, ên he nêl kitong lec buc wê obêc val timuên ge. Dì xam xovô xolac wê il Apumtau vông ge. Apumtau vô il vêl ên il nêd nipaên, dì vông i xolac vô lime sinale dì he nêl kitong vô xam mi xam ngô. Om xam ngô dì xovô i tii vac.

<sup>3</sup> Om xam lêc xovô taxlee bêga bê vô buc timuên ge od tibii ya obêc val vô xam dì ob timu vô môp wê he nilô kidu he ên nêb he ob vông ge, dì he ob so vya vô xam ên wê xam vông i vin Anutu ge, om he ob yax mang dì nêl vô xam bêga ên nêbê, <sup>4</sup> “Yesu nêl vô xam ên nêbê obêc vena vô xam, me? Om tyo dô gê tina? Wê lê, Yesu o vena lêm. Nge, vô buc wê Anutu tung lag yuu kibun ge, dì i la vô buc wê il mage buge yib ilage, dì i val tyip gwêbaga hixôn, susu hixôn kiyang vihati dô tiyi xocbê dô ilage dì ti o pilepac lêm.”

<sup>5</sup> He ob nêl kiyang tibêge vô xam, lêc he nêbê he ob xovô yuac wê Anutu vông ilage lêm. Yuac wê Anutu vông ilage bêga nêbê Anutu nêl dì lag yêp dì kibun val tyip vac mia nilô dì yêp vac mia mahigun. <sup>6</sup> Lêc kibun o yêp bêge xuhu dia lêm.

Nge, timuên ge od Anutu nêl dì mia hivun kibun xôn ên wê xomxo vông nipaên ge. <sup>7</sup> Léc lag yuu kibun wê yêp gwêbaga, Anutu nêl ên nêbê yuu ob yêp dì i loc tyip lec buc wê ngwax obêc ya yuu xôn vêl ge. Vô buc tige Anutu obêc yaxêñ xomxo vihati nêñ kiyang dì obêc kitya he wê vô nîmi vô i ge vêl.

<sup>8</sup> Xam lige, le i lêc lungêñ kiyang tiga lêm. Kiyang tiga nêl bêga ên nêbê buc wê il xê ên il nêb buc myabo tya ge Anutu yê nêb buc dia tiyi xochê klismas 1,000, dì buc wê il xê ên il nêb buc dia ge Anutu yê tiyi xochê buc tibed. <sup>9</sup> Om xomxo ya so ên he nêb mêt Apumtau vông yuac hiyi hiyi om kiyang wê nêb ob vena ge gêñ o vô nôn lec lêm. Ge he so. Ên Apumtau o vông yuac hiyi hiyi lêm. Nge, bin xomxo wê vô nîmi vô i ge ên nêb he i pilepac he vêl ên nipaên wê he vông ge, ên Apumtau xo ên nêbê xomxo ti i o lêc yib mi la vac nipaên lêm.

### *Lag yuu kibun xôa obêc ma*

<sup>10</sup> Buc timuên wê Apumtau obêc vena lec ge, buc tige obêc val tiyi xochê xomxo yôdac ti. Ên buc tige il o xovô lêm. Vô buc tige lag obêc vô nididun levac dì xôa obêc ma, dì ngwax obêc ya lag yuu kibun hixôn susu vihati ma vêl.

<sup>11</sup> Vixôhilôg nôn, Anutu obêc kitya susu lag yuu kibun vihati vêl. Om gwêbaga xam ob dô bêna? Xam vông môp ngibua i vô nôn lec vô xam dì timu vô môp wê Anutu vông ge, <sup>12</sup> dì xam dô bin Anutu buc wê obêc val timuên ge dì vông yuac xekizêc ên buc tige i val sebseb. Vô buc tige ngwax obêc ya lag ma vêl, dì susu vihati obêc

didee ên ngwax levac dì xôa obêc ma. <sup>13</sup> Ilage Anutu hilu kiyang pyap ên nêbê lag yuu kibun paha obêc yêp tîmuên, dì kiyang nivîha obêc hîvun xôn, dì nipaên ti obêc yêp hixôn lêm. Om il bin lag yuu kibun paha wê obêc val ge.

<sup>14</sup> Xam lige, xam mi dô bin lag yuu kibun wê paha ge, om xam viac xam nivîha dì vông yuac xêkizêc ên Anutu i yê xam tîyi xocbê nipaên ti o yêp vô xam lêm ge dì i yê xam tîyi xocbê xam dô vac kiyang malehe ge. <sup>15</sup> Xam xovô bêga bê Apumtau venaên gên ma, ên dô bin xomxo vîhati ên nêb he i pilepac he ên i kitya he nêñ nipaên vêl. Kiyang tige tîyi xocbê kiyang wê Pol kivuu ge. Pol ge il lig wê il xêdyaa vin lec i ge. Anutu vông xovô ôn vô i, <sup>16</sup> om i kivuu kiyang tiga vac kîpihac vîhati wê i kivuu ge. Kiyang wê Pol kivuu ge, kiyang ya viyin di kehe o yêp seac lêm, om vông yuac levac vô il ên wê il ob xovô kiyang wê i kivuu ge kehe. Om xomxo piyôp maên wê o le xêkizêc lêm ge, he ya pilepac xolac wê Pol kivuu ge vac dì kiyang vîhati wê yêp vac xolac ge hixôn. Om Anutu obêc kitya xomxo tigee vêl vô buc tîmuên.

<sup>17</sup> Xam lige, xam xovô pyap ên xam nêbê xomxo tigee mi nêl kiyang kityooêñ dì pwoo Anutu kiyang vac. Om xam viac xam ên he, gec lêc he dîdii xam la vac kiyang kityooêñ wê he nêl ge dì vông xam sea vông vinêñ wê xam vông ge. <sup>18</sup> Apumtau Yesu Kîlisi vô il vêl ên il nêd nipaên. Om a nêl vô xam bêga bê xam vông xovô ôn yuu xêdyaa vin lecêñ wê Yesu vông ge i vô levac vac xam nilôm. Yesu lê i vô levac gwêbaga dì i yêp luta lêc luta. Nôn.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 11 Nov 2022 from source files dated 9 Oct 2020

3d2c844d-4bc8-590b-bbf2-3a5fcd1f7ad8